

喜歡？愛？

作者: 如影隨風

Powered by [紙言](#)

# 喜歡？愛？

噶日，我同阿詠行下街嘅時候，佢突然問我：「點解你會鍾意我嘅？」

「因為係你靚囉。」冇錯，就係咁膚淺。呢個答案係絕大部份男人鍾意一個人嘅先決條件，唔信你睇下大部分嘅豬排係咪仲係單身？你試諗下，一個人嘅外表唔討好，邊會有心去了解佢內在？所以奉勸大家一句，千其唔好信個啲話鍾意你夠斯文，夠溫柔之類讚到你天上有地下無嘅說話。

「但我會老，樣會殘，咁你之後咪會唔鍾意囉。」阿詠邊講邊擺出一副發鬍谷起塊面嘅樣。

「所以而家已經唔鍾意啦。」話音未落我已經感受到心口好似俾架火箭撞落嚟咁，痛到跳舞。

「喂呀，我都未講完呀，其實我唔鍾意你好耐啦，因為.....我愛你。」

「哼，咪一樣，有咩唔同呀。」

「不如你聽我講個故事丫。」

「以前，深山入面有一對夫婦，男嘅傻，女嘅癲.....」講講下，突然俾阿詠打斷。

「喂喂，又傻又癲又深山，青山咋掛，你咩故事嚟架，咪係到作嘞。」阿詠哭笑不得咁講。

「cctvb嘅劇古代有烏龍茶樽，現代識突然換衫你都係咁追啦，癲同傻嘅係深山結婚點會冇可能啫。嘩，唔好再打斷我啦！」

有一日，癲嘅問個傻嘅：「傻佬，點解你肯為咗放棄晒屋企所有嘅錢，都要同我係山到捱，乜都由頭開始過，連屋都要自己起呀？」

「因為我愛你。」傻佬嘅答案好簡單直接。

癲婆：「但你唔愛你屋企啲錢咩？啲錢真係夠你用十世，條件仲要係只要唔同我一齊，點解你咁傻架？」

傻佬：「錢係人都鍾意，但我愛嘅係你。」

癲婆：「鍾意同愛有咩唔同啫，你真係當我傻架？」

傻佬：「鍾意就係希望自己嘅付出有收獲，係雙向架，當對方停止咗回報，另一方都會唔再付出，簡單啲講就好似場愛情交易咁。而愛就係無條件咁付出，不求回報，就算望唔到收獲都會繼續，因為愛係一種好深厚嘅感情，隨住時間而升華，絕對唔係一場交易。」

癲婆：「丫，好難明呀，咩交易唔交易，唔理呀，總之我話一樣就一樣啦。」

「故事到呢到，聽完你又明唔明呢？」

「我剩係feel到有人曲線話我癲婆囉！」阿詠扁住咀咁講。

「唔係呀，你誤會咗啦，都有曲線話你，跟本曲到直啦。」話畢我個心口又中「箭」。

「咁你會唔會一直愛我架？」雖然問得好漫不經心，不過你呃我唔到嘅。

「嘩，一直愛你咁蝕抵，乜嘢回報都有嘅，都真係要諗下架！」

「去死啦！」說罷阿詠就甩開我隻手，自己行前。

我對住佢嘅方向大叫：「阿詠~~~~~」

當詠擰轉頭望過我個方向，佢成個人呆咗。

我就半跪咗係佢面前，手上係我一路準備咗好耐嘅求婚戒指。

「咳，無條件咁愛你一世實在太唔抵啦，所以容許我貪心啲，有一個條件----嫁俾我，俾我同你組織一個小家庭，永遠係你身邊，做你永遠嘅避風港。」

「阿恆...」阿詠就好似仍然未識反應咁，而眼淚就不停咁流。

「嘩，唔say no當你應承架啦。」

我起身，抱起阿詠，完全無視街上嘅人嘅目光咁大叫：「我終於得咗啦！！！！！」